

Plenchi

Bèl a bati

TRINGG TRINGGG bèlèm..... TRINGG TRINGGG bèlèm.....

Karnaval ta tras di lomba i nos a drenta nos dianan di kuaresma. Den bida nos mester balansá e kosnan. Fiesta, pero tuma tempu tambe pa apstené i reflehá. Esaki ta e temporada pa bo skohe kiko bo ta bai apstené di dje. Tuma bo desishon i kisas ta bon pa kambia loke o ta hasi semper pa ayuno. SI semper bo ta apstené di karni i alkohol kisas bo por apstené di usa palabranan grosero of ku a ofendé.

Awe nos ta duna bo algun ehempel kiko bo por apstené di dje.

Un felis wikènt pabo yená ku pas i trankilidat.

Riba roster

Ayuno y apstenensia

Apstené di usa palabranan ofensivo i usa palabranan di pas.

Apstené di ta di mal beis i purba muestra un aktitut di gratitut.

Apstené di falta di pasenshi i muestra pasenshi.

Apstené di pesimismo y reflehá speransa.

Apstené di prekupashon y biba bo fé.

Apstené di reklamo y demostrá simplesa.

Apstené di amargura y yena bo kurason ku sentimentu kontentu.

Apstené di pone bo mes sentral y muestra kompashon pa otro.

Apstené di papia y skucha mas.

Den Agenda

Liber di skol:

Mart dia 26 pa aprel dia 4 Pasku Grandi.

Liber nashonal:

Mart dia 30 Bierne Santu

Aprel dia 2 Dos dia di Pasku Grandi.

Not'è riba bòrchi

Den kuadro di aktividatnan di nos Parents University St Antonius College (PUSAC) nos a organisá pa di tres aña konsekutibo un mainta di observashon/ kijkochtend pa tur nos mayornan. Mayornan por a mirá i partisipá na e lèsnan. Ta hopi dushi pa mira kon orguyoso e yunan ta di nan mayornan. Ta un grato sentimentu di por a nota kon kontentu hinter famia di SAC ta, ku nan ta forma parti di e proseso di desaroyo di enseñansa di “nos” yunan/ alumnonan.









Mi ta konta

Ninita a hunga ròl di bobo

Ninita ta wela di Robert, Devon i Carla. Kasi bo por bisa ku Ninita a kria nan. No ku esei tabata e idea. Promé ayá nan mama Merilin tabata buska nan tur atardi, asina e sali fo'i trabou. Nan tata, Geoffry, ta traha komo purser riba avion i ta traha oranan iregular.

Poko poko Merilin a kuminsá buska e muchanan mas lat. Esun dia ta paso e ke kumpra kos trankil sin mucha rònt di dje, otro dianan ta paso e ke bai 'gym' despues di trabou, djabièrnè ta pasó e ke bai 'happy hour' ku algun kolega. Despues el a kuminsá hiba nan serka Ninita den fin di siman tambe p'e hunga sòftbòl ku su amiganan. Ninita a papia hopi ku Merilin pa e tuma

mas tempu pa su yunan. Pero Merilin ta zundra: “Laga mi gosa ku mi amiganan, no? Ta un biaha so mi ta biba!

P’esei Ninita a planea un triki ku el a mira den un whatsApp ku ta sirkulando rònt Kòrsou.

El a hunga ròl di bobo i a pidi Merilin i Georffry pa siñ’é graba ku su telefon. Asta Ninita a graba un entrevista ku Merilin i Georffry pa tèst su telefon. El a puntra nan: “Di tur hende na mundu, ku ken boso lo ke pasa tur fin di siman di boso bida?” Merilin i Geoffry a hari mashá. Nan a kuminsá menta nòmber di artistanan lokal i internashonal manera Urvin Jano, Dibo Doran, Beyoncé, Jay Z, Shakira i otronan. Ora a kaba nan a pidi Ninita pa nan mira e grabashon. Ei Ninita a kue nan di sorpresa. El a bisa ku el graba nan yunan tambe, i awor e ke mustra nan kiko Robert, Devon i Carla a kontestá riba e mes pregunta. Ku hopi bèrguensa Merilin i Geoffry a tende kada un di nan yunan kontestá: “Mi ke pasa tur fin di siman ku mami i papi.” Y ora Ninita a puntra nan pakiko, nan tur tres a kontestá: Pa nos pasa dushi ku nan. Pasó ta un biaha so nos ta mucha.”

Mucha djispou

Yufrou: “Kiko ta hel na ingles?”

Percy: “Yellow”

Yufrou: “traha un frase di dje.”

Percy: “Mi por a haña un glas ku yellow”